

## **Mensahe di Atvènt 2014**

***[Pa lesa den tur misa i kapèl den nos Diósesis di Willemstad, riba promé djadumingu di Atvènt 30 di novèmber 2014].***

Rumannan stimá,

Pas i amor di Hesukristu sea ku boso!

*“Keda semper kontentu den Señor. Mi ta ripití: keda kontentu!*

*Laga tur hende mira kon amabel boso ta. Señor ta serka! (Fil 4, 4-5).*

Ku e bunita palabranan di ánimo di San Pablo ku nos ta bai skucha riba e di tres djadumingu di Atvènt, yamá *“Djadumingu Gaudete”*, mi ta invitá boso pa drenta e temporada di Atvènt di e aña aki gradisiendo nos Bon Dios pa e entusiasmo di papa Francisco ku ta plamando rònt mundu, i ku el a ekspresá den su Ekshortashon Apostólíko: *“E alegría di Evangelio”*.

*“E alegría di Evangelio ta yena kurason i bida hinté di esnan ku ta topa ku Hesus. Esnan ku ta lag’é bira nan Salbador, nan ta keda librá di piká, di tristesa, di bashí interior, di soledat. Papa ta invitá nos pa un renobashon “awor” di nos enkuentro ku Hesukristu òf, al ménos, ku nos pèrmiti’E topa ku nos”(EG 1). E palabranan di papa Francisco ta pas kompletamente ku loke San Pablo ta bisa.*

Nos a drenta un aña litúrgiko nobo, esaki tambe ta motibu di alegría, pasobra Dios ta duna nos e regalo di por mira un aña nobo pa nos selebrá e diferente misterio di Hesus su bida. Ta un bon okashon pa gradisí Dios Tata pa tur bondat ku El a duna nos den e aña litúrgiko tras di lomba i pa nos pidié

alimentá nos speransa.

Den Atvènt nos lo tende hopi biaha mensahenan di speransa; mensahenan di kombershon, ku ta bisa mundu hinter: nos no por sigui manera ántes. *Tur kos mester kambia* pasobra nos Salbador ta na kaminda. E ta ofresé nos un komienso nobo i nos mester hasi bon uso di e oportunitat aki. Ban sagudí nos mes i pone tur nos mal kustumbernan un banda. Prepará e kaminda pa Señor!

Ami tambe ta sinti alegria ku mi por duna boso un man pa subi un kaminda nobo huntu ku otro.

Den nos Konferensha di Klero ku a tuma lugá na Boneiru, den luna di òktober pasá, nos a invitá boso pa transformá nos diósesis den un Iglesia mishonero ku ta sali bai hiba Hesukristu na tur e áreanan di nos sosiedat. E prioridatnan ku nos a deskribí den e Plan Pastoral 2014 – 2017 tin komo intenshon pa duna nos diósesis forsa nobo, entusiasmo i kompromiso, manera papa Francisco ta mustra nos awor tur dia di nobo.

P'esei tambe mi ta rekomendá boso pa hasi bon uso di e dokumentu aki di Papa, komo fuente di inspirashon pa e temporada di Atvènt i Nobena di Pasku di Nasementu. Nos preparashon mester ta personal, pero tambe komo famia: ban enkontrá Hesus. Habri porta di bo kurason i di bo kas pa E por drenta.

Pone bo fe i speransa den djE; trese tur bo preokupashon serka dje, tur bo deseonan. Resa ku konfiansa pa E kambia nos, renobá nos.

Rumannan, mara e tempu di Atvènt por ta un tempu di gracia pa nos tur i ku Pasku di Nasementu lo ta yen di pas, pa nos por drenta 2015 ku un disposishon realmente nobo.

Ku Mama Maria sostené nos i presentá nos súplikanan serka Tata selestial.

*Mi kier pidi boso atenshon tambe pa un punto èkstra: Papa Francisco a proklamá 2015 **Aña di Bida Konsagrá**. E aña spesial ei ta kuminsá awe i ta kaba riba Dia Mundial di Bida Konsagrá, 2 di febrüari 2016. Laga nos ofresé nos orashonnan na Dios pa bendishoná tur esnan ku a drenta bida konsagrá i asina ta aportá na edifikashon di Dios su Reino aki na mundu ku nan entrega total i nan orashon. Un aña litúrgiko 2014 – 2015 yen di bendishon di Dios!*

Boso sirbidó den Hesus i Maria,  
Luis A. Secco, SDB  
Obispu di Willemstad